

Headline	Status zakat pendeposit TH		
MediaTitle	Utusan Malaysia		
Date	11 Apr 2014	Color	Full Color
Section	Supplement	Circulation	173,387
Page No	24	Readership	699,000
Language	Malay	ArticleSize	541 cm ²
Journalist	N/A	AdValue	RM 10,692
Frequency	Daily	PR Value	RM 32,077



APABILA TH menunaikan zakat perniagaannya, ini bermakna pendepositnya juga telah berzakat. (Gambar hiasan)

Tidak ada zakat atas harta yang sama sebanyak dua kali dalam tahun yang sama

SAYA dimaklumkan bahawa, apabila Tabung Haji (TH) sudah pun menjelaskan zakat bagi pihak pendeposit, maka akan terlepaslah bagi orang yang menyimpan wangnya di TH daripada mengeluarkan zakatnya. Soalan saya, bagaimanakah kondisinya bagi orang yang simpanannya di TH adalah lebih rendah daripada nisab? Bukankah daripada segi syarat, dia masih tidak wajib mengeluarkan zakatnya.

Jawapan

Semoga Allah SWT memberkahi kehidupan kita sehari-hari. Mudah-mudahan, jawapan yang disuguhkan ini mampu memberikan pencerahan kepada semua pihak, insya-Allah.

Baiklah, sebagaimana yang telah diterangkan di dalam ruangan ini pada sebelum ini, sesungguhnya Tabung Haji (TH) adalah sebuah institusi kewangan yang unik kerana semua pendeposit atau penyimpan di dalamnya, hakikatnya adalah pemilik kepada TH. Jika saudara menyimpan di TH, hakikatnya wang yang saudara simpan itu adalah modal perniagaan di TH dan saudara juga adalah sebahagian daripada pemilik di TH.

Maka, apabila TH mengeluarkan zakat perniagaannya pada setiap tahun, secara automatik setiap orang yang menyimpan (melabur) di dalamnya juga dikira sudah menunaikan zakat dan terlepaslah mereka daripada mengeluarkan zakatnya buat kali kedua. Ini kerana, tidak ada zakat atas

Headline	Status zakat pendeposit TH		
Media Title	Utusan Malaysia		
Date	11 Apr 2014	Color	Full Color
Section	Supplement	Circulation	173,387
Page No	24	Readership	699,000
Language	Malay	Article Size	541 cm ²
Journalist	N/A	Ad Value	RM 10,692
Frequency	Daily	PR Value	RM 32,077

harta yang sama sebanyak dua kali dalam tahun yang sama.

Maka, bagaimana pula dengan mereka yang menyimpan di dalam TH dalam jumlah yang kecil, seperti RM5,000 sahaja, sedangkan nisab zakat adalah RM15,000; maka bukankah jumlah itu jauh lebih kecil daripada nisab. Bukankah

syarat wajib zakat itu mesti mencapai atau melebihi paras nisab?

Hakikatnya, TH sebagai badan yang diamanahkan untuk menjalankan perniagaan bagi pihak semua pencarum, telah bertindak secara benar dalam menaksirkan zakat perniagaannya. Dalam konteks ini, TH hakikatnya telah mengaplikasikan satu kaedah dalam menaksirkan harta zakat, iaitu dengan mencampurkan semua harta di bawahnya. Percampuran harta inilah yang disebut sebagai *khultah*.

Apakah *khultah*? *Khultah* bermakna percampuran bagi harta yang mempunyai bilangan pemiliknya lebih daripada satu, dengan niat perkongsian, dalam satu jenis harta yang sama. Misalnya, dua penternak kambing masing-masing mempunyai jumlah kambing yang tidak cukup nisabnya; namun kambing-kambingnya

diternak secara usaha sama.

Contoh, Si A dan Si B telah bersetuju untuk menjalankan usahasama menternak kambing. Namun jumlah pemilikan mereka tidak sama. Si A memiliki 20 ekor dan si B memiliki 30 ekor, sedangkan nisab bagi kambing adalah 40 ekor, barulah wajib dizakatkan seekor. Maka di sini, jika dikira berasingan kedua-duanya tidak mencapai syarat nisab.

Pun begitu, dalam hal ini, hukum syarak menetapkan hakikatnya, hendaklah dicampurkan kedua-dua pemilikan

tersebut, kerana mereka memang telah berniat sejak awal untuk menternaknya secara bersama. Maka, apabila 20 ekor dicampur 30 ekor, jadilah 50 ekor dan cukuplah nisabnya, dan pada ketika itu wajiblah mereka untuk mengeluarkan zakatnya (rujuk *Fiqh al-Manhaji*, Jilid 1, hal. 448).

Samalah keadaan ini dengan pemilikan seseorang yang masih di bawah paras nisab dalam TH. Oleh kerana semuanya

di bawah satu pelaburan di TH, maka jumlah yang kecil akan menjadi besar dan melebihi nisab apabila digabungkan keseluruhan wang yang ada (yang dianggap modal di TH), dan ketika itulah ia wajib dizakatkan.

Dr. Abdul Karim Zaidan menukilkan di dalam kitabnya, menurut pandangan jalur Syafie, Hassan al-Basri dan as-Sya'bi, sesungguhnya harta kekayaan yang dimiliki secara bersama adalah sama tarafnya dengan harta kekayaan yang dimiliki oleh seorang (satu individu). Jika harta kekayaan yang dimiliki secara bersama itu mencapai nisabnya, maka ia wajib dikeluarkan zakatnya, walaupun setiap orang yang bergabung itu memiliki kurang daripada ukuran nisab. Ketentuan ini berlaku untuk semua jenis harta kekayaan." (*Ensiklopedia Fiqh Wanita Jilid 2*, hal. 23)

Nota: Disediakan oleh Ustaz Hamizul Abdul Hamid, Eksekutif Dakwah, Lembaga Zakat Selangor (MAIS). Sebarang pertanyaan atau pandangan, sila e-melkan kepada hamizul@e-zakat.com.my dan untuk maklumat lanjut sila layari media sosial LZS di www.e-zakat.com.my, <http://blog.e-zakat.com.my> atau [Facebook.com/lembagazakatselangor.MAIS](https://www.facebook.com/lembagazakatselangor.MAIS).



TH telah bertindak benar dengan menaksirkan zakat perniagaannya.
Gambar hiasan



Bicara Zakat